

96
4015
nouveau
1837
Double N° 9.
LETTRE

D'AVIS

A MESSIEVRS

D V

PARLEMENT

DE PARIS.

ESCRITE PAR VN PROVINCIAL.

par J. Baudouin H^{re} de Chantier
A PARIS,

M. DC. XLIX.

LETTRE

DAVIS

A MESSIEURS

PARLEMENT

DE PARIS

ESCRITE PAR MESSIEURS

1789

LETTRE D'AVIS, A MESSIEURS
du Parlement de Paris, écrite par
vn Prouincial.



ESSIEURS.

J'ay à vous demander pardon d'abord, si j'oté faire porter à cette lettre, le titre d'Avis à vostre Cour, parce qu'il semble que ie vueille donner de la lumiere au Soleil, ou des eaux à l'Ocean: neantmoins mon excuse vous paroistra peut-estre legitime, si ie vous dis que les plus grands esprits, pour estre trop attachez aux reflexions qu'ils font sur de hautes affaires, choppent assez souvent en celles qui sont fondamentales, parce qu'ils les negligent comme leur paroissant trop petites. L'on a remarqué le tour que fit vne Milesienne au Philosophe Thales: elle le voyoit tousiours occupé dans la contemplation des astres, & ses yeux fichez sur les cieux, & mesmes en marchant par les rues pour luy faire pressentir qu'il deuoit penser premierement à ses pieds, elle mit quelque escabelle deuant luy qui le fit tomber. C'est en vain qu'on coupe les branches des ces mauuaises plantes qui s'attachent aux bonnes; si l'on n'en arrache la racine, le premier printemps leur redonne la naissance, & les fait bien souvent repousser avec plus d'estendue. Il vous en peut arriuer de mesme dans la conioncture des affaires presentes, car si vous ne déracinez les desordres qui s'attachent maintenant au Ministère, vous y pourrez bien en effet apporter quelque amendement, mais le principal y demeurant, ce sera tousiours à recommencer, & vous vous exposerez au hazard de les reuoir dans peu de téps regner, & peut-estre avec beaucoup plus de violence. Prenez donc en bonne part, Messieurs, quelques reflexions que faisoit n'agueres vne Compagnie assez considerable dans la Prouince, sur les mal-heurs de nosiours, & qu'elle me pria de vous adresser: Je l'aurois fait plustost sans que nous receuions à toute heure de la part des

Ministres de S. Germain, que des gazettes & des billets, où l'on disoit que Paris estoit aux abois, que l'ardeur des Bourgeois n'estoit qu'un feu de paille, que la prise du village de Charenton & deBrie auoit mis la consternation si auant dans leurs esprits, qu'ils estoient prests de se mutiner contre vous & contre vos chefs, que la diuision s'estoit mesme desia glissée parmy les Generaux; en un mot, qu'ils estoient sur le point d'aller à S. Germain la corde au col, pour demander pardon de ne s'estre pas laissé mourir de faim. En effet vne nouuelle qui nous vint en mesme temps de Paris, nous confirmoit en quelque façon tout cela, qui portoit que vous parliez desia d'accommodement, & que mesme vous condescendiez à vne paix, dont les articles estoient fort peu auantageux pour ne pas dire pis. Mais vostre poste nous a enfin desabusez & assurez du bon ordre de vostre ville; & de la bonne intelligence qui est entre les Bourgeois & vous, ce qui m'a obligé de despescher la presente & de vous l'enuoyer; afin que si vous venez à quelques termes d'accommodement, vous examiniez quelques causes que ie marque, d'où nous croyons que prouiennent tous nos maux, & que vous y apportiez le remede que vous iugerez estre necessaire.

*La 1. cause
des desordres.*

La premiere cause que nous trouuions, est que vous ne faites pas assez de reflexion sur ce que vous estes. Nous ne sommes genereux qu'autant que nous le croyons estre; cōme nous ne sommes poltrons que pour auoir trop de desiance de nos forces; c'est pourquoy, dit-on, Dieu ne voulut pas donner aux animaux, la connoissance de ce qu'ils pouuoient, autrement l'homme n'auroit iamais pû en venir à bout, ny les dompter comme il fait. Si vous auez consideré plustost le rang que vous tenez dans l'Estat & le suier de vostre establisement, vous n'auriez pas supporté toutes les indignitez qu'il vous a fallu miserablement souffrir durant le regne passé & pendant la Regence, & vous vous seriez opposez fortement à tant de concussions qui se sont commises à l'oppression des peuples, dont vous deuez estre les Peres & les Protecteurs.

Car l'on ne peut oster à vostre Parlemēt qu'il ne soit le Soleil de toute la France, & peut-estre de toute l'Europe, puis qu'il n'y a guerres de Prince qui n'en reuere les Arrests, tesmoin les sentimens de l'Archiduc Leopold qu'il vous a fait declarer par son Courier, & qui ne croye qu'ils partent de la Cour de ces grands Areopages ou du Senat Romain en sa splendeur: comme à vray dire, vous n'estes ny moins Venerables ny moins Augustes qu'eux; & si un second Cyneas vous voyoit en corps, il pourroit dire à iuste titre ce que dit l'Ancien, en voyant la Cour Romaine, que la vostre ne luy sembleroit pas vne assemblée d'hommes, mais un Consi-

stoire

Aïre des Rois. Souuenez-vous donc, Messieurs, que vous estes ces Dieux Consentes, sans lesquels les Rois ne peuvent rien faire de iuste ny de consequence dans le gouuernement de leurs peuples, que vous deuez estre l'Azile & les Genies tutelaires de toute la France, la Lumiere des bonnes mœurs, & les Maistres de l'equité; que vous estes les premiers mobiles qui faites mouuoir toutes les Prouinces par le contrepoids de vos iugemens, & que vous les emportez par rapidité: En vn mot, que vostre Compagnie doit estre composée de tout ce qu'il ya de meilleur & de plus excellent en tout le Royaume, puis que de vous dépend toute la Iustice qui s'y exerce. Aussi n'y a-t'il parsonne qui vous dispute ces qualitez, toutes les Villes & les Prouinces se rendent obeïssantes à vos Arrests; & tous vos Freres des autres Parlemens ne parlent de vous qu'avec des respects qui vous sont deus, & par vostre merite, & par le droit d'aisnesse & de primogeniture; si bien qu'il vous est tres-facile maintenant, & ie dis dauantage, vous estes obligez de reprendre vos premieres brisées, & de rentrer dans la glorieuse iouïssance de tous vos droicts & priuileges, pourueu que vous foyez aussi genereux & constants à les poursuivre, que les Prouinces sont disposées de vous assister de ce qui vous sera necessaire.

La seconde chose que nous remarquions pour estre la cause de nos malheurs, est la venalite de vos Charges; elles ne deuroient estre que des recompenses d'honneur & de merite; comme elles estoient autrefois; & neantmoins elles sont montées à des sommes si excessiues, que la perte d'une seule emporte bien souuent avec soy la ruine totale d'une, & par fois de plusieurs familles. De là vient que pour vous en exempter, vous estes contrains de les racheter par la Paulette, & de verifier tous les Edicts que la tyrannie des Ministres vous enuoye, pour la crainte que vous auez ou de les perdre tout à fait, ou d'en estre du moins interdits: ou bien s'ils n'osent pas tousiours se porter à ces excès de violence, & qu'ils vous trouuent dans vne ferme resolution de ne rien passer à l'oppression du peuple, ils taschent de gagner les vns d'entre vous par des pensions, & les autres par de belles esperances, sappans ainsi les fondemens de vostre Authorité, suiuant les erres & l'instruction du Cardinal de Richelieu, ingenieur, mais detestable artisan de tous les maux que nous souffrons, & dont la tyrannie insupportable iointe à l'esclauage que quelques vns des vostres voulurent subir sous ce superbe Fauory, donna lieu à empier sur vous, & à faire de la France comme d'une terre de conqueste. Et tous esfois n'en pouuant encore avec tout cela venir à bout, parce qu'il se trouuoit tousiours nombre de braves hommes qui s'opposoient vertement à ses damnaibles desseins, il donna telle impression d'eux au Roy defunct de la facilité duquel

*Venalite'
des Charges
de Iustice
cause de nos
maux.*

il abusoit, que i'ay ouy dire à des personnes qui l'approchoient d'assez près, que s'il eust pû, sans faire vne iniustice trop manifeste, & sans renuerfer les loix de l'Estat, il eust exterminé iusques au dernier Conseiller du Parlement, pour en faire vn tout nouveau à sa fantaisie: C'estoit faire le souhait de cet Empereur, ou plustost Tyrann des Romains, qui desiroit que le Senat n'eust qu'une reste pour la faire sauter tout d'un coup. Vous avez encore esté pis sous l'empire du Sicilien, de qui vous n'avez iamais pû auoir vne belle parole, si ce n'est celle qu'il fit dire à vn des Princes qui le protegent, lors que vous vous plaigniez del'enleuement d'un de vos Freres, que le Roy pouuoit faire de ses valets ce qu'il vouloit; faisant sans doute allusion à de semblables de Caligula qui appelloit le Senat Romain, *seruos suos togatos*, c'est à dire, selon la propriété des mots de ce temps-là, ses esclaves de longue robe.

C'est vne guerre que les Mignons des Princes ont tousiours eue avec des Compagnies semblables à la vostre, sur la pensée qu'ils ont que leur tyrannie ne peut subsister avec des ames entieres & des-interressées; à moins que ce ne soient des Mignons & des Ministres aussi gens de bien que l'estoient Mecenas & Agrippa sous Auguste, qui bien loin de porter leur Maistre à rabaisser l'autorité du Senat, contribuerent de tout leur pouuoir à en augmenter le lustre & la splendeur, tesmoin la reueue qu'il en fit, où il casta tous ceux qui s'y estoient intrus par l'insolence des guerres. Tibere son successeur fut extremement deferant à cette mesme Compagnie pendât qu'il fut maistre de son esprit, luy renuoyant la connoissance de la pluspart des affaires, iusques-là mesmes qu'il protesta de n'accepter l'Empire, que pour en faire les Conseils, & se ioinde aux Consuls, pour le bien des affaires publiques. Mais quand Seian se fut emparé de son esprit, l'on ne vid plus que des proscriptions & des bannissements dās cet Ordre, parce que ce monstre se noyoit enuironné d'autant d'ennemis qu'il y auoit de Senateurs; si bien que pour en gagner partie, il se desfaisoit des plus gens de bien, se montrant ouuertement protecteur des Delateurs, & faisant controuuer mille faux crimes & former vne infinité d'accusations sans fondement. Alors les moins courageux se rendoient ses esclaves, pour ne pas tomber dans le malheur de leurs freres; & luy qui se seruoit adroitement de l'occasion, remplissoit le Senat de ses creatures, afin que desormais il nes'y pust rien passer à son des-advantage. Ces temps-là estoient veritablement pleins de desordre, mais qu'estoit-ce en comparaison de ceux-cy: ils n'auoient tout au plus qu'à combattre l'ambition de ceux qui voulans monter aux Magistrats par quelque moyen que ce fust, abandonnoient le party de leurs freres; car les dignitez de Sénateur ne coustoient rien, & l'interdiction estoit plustost vne descharge

Tacite l. i
ann.

l'orique
de nos
temps.

d'affaires, que la perte d'aucun, bien qui fust affecté à la Charge: mais auourd'huy vous auez l'ambition à combattre des vns qui vous trahissent sur l'esperance qu'ils ont d'estre eleuez à quelque chose de plus eminent, & la lascheté des autres qui vous abandonnent, pour les pensions qu'ils prennent, & pour la crainte qu'ils ont ou d'une interdiction ou d'un bannissement.

Si le mal est donc si grand, pourquoy l'entretient-on? quelle apparence y a-t'il de fomentier vne playe qui consomme tout le corps? sommes-nous insensibles iusques au point que de ne voir pas, ou de n'estre pas touchez des rauages que cause ce desordre? Prenez garde, Messieurs, comme il en est toujours allé de pis en pis depuis que vos Charges ont commencé à se vendre. Auant Louis XI. les Rois ne leuoient rien sur leurs Sujets que par le consentement des Estats, ou qui ne fust du moins autorisé par la Cour de Parlement: mais ce Prince qui les mit hors de page commença de se seruir en ses Patentes des termes de certaine science, plain pouuoir & autorité, & pour imprimer de la crainte dans les esprits des Officiers de Iustice qui s'en formalisoient, il proposa à l'instigation de ses Courtisans de mettre leurs Charges en vente. Le plus fort l'emporte, dit-on: le vulgaire des hommes se porte plus chaudement à poursuivre ses interets que ceux du public: afin qu'on ne touchast point la corde qui faisoit mal à leurs oreilles, ils baissent la teste, & ne s'opposent à rien. Dequoy les Rois suiuaus faisans leur profit, ne manquerent pas de remettre l'un en auant, sans crainte de perdre l'autre: si bien que Louis XII. vendit tous les Offices des Finances, sans toucher toutesfois à ceux de la Iustice, qui estoit vne adroite procedure, pour les desuinit par les diuers traitemens qu'il leur faisoit: mais François

Ce fut l'an

I. n'ayant plus que ceux-cy à mettre à la raison, les obligea tous, sans restriction, à acheter leurs Offices, & de lors establit le bureau des Parties Casuelles, pour seruir, dit Loyseau au liure second des Offices, d'eschope & de boutique à cette marchandise nouvelle. Je ne parle point de la plainte qu'en firent les Parlemiens aux Estats de Blois derniers, ny des diuerses propositions qui furent faites pour tascher de les contenter, le dernier coup de massue vous fut donné l'an 1604. par vn nommé Charles Paulet Secrétaire de la Chambre du Roy, parain de la Paulette, qui fut le premier partisan de vos Charges, moyennant le soixantième denier de la finance. Qu'est-il arriué depuis? il n'est pas besoin de vous en parler, vous le sçaez mieux que moy; tout ce qu'on en peut dire est que le mal

1522.

3. Cause re-

Je pourrois rapporter pour la troisiéme cause de nos malheurs, la promotion qui se fait des races partisans aux charges de Conseil

ietée sur
les parti-
sans Com-
seillers.

l'estime avec plus de douceur que ne font la plupart des hommes, quil ne faut pas tant prendre garde à la naissance d'un Recipiendaire, qu'à sa vertu & à son mérite. Et neantmoins quand ie fais reflexion sur les inconueniens qui en arriuent, ie suis comme forcé à renoncer à mon sentiment, comme en effect il n'est pas croyable qu'un homme attaché de fortune & d'intérêt à un Ministre, abandonne ce qui le touche, pour suivre le party de ceux dont il est hay: ce seroit s'abandonner soy-mesme; & s'il s'en trouue quelques vns d'assez genereux pour renoncer à toutes ces alliances plastrées par les concussions, & cimentées par des larcins, comme il s'en est trouué en vos grabuges, l'on peut dire que c'est un prodige, & que la fortune leur a esté marastre, de faire prendre à ces belles ames des corps empestez de la corruption Partisane. Il ya encore vne autre raison qui regarde l'honneur de vostre Compagnie, de n'y admettre personne qui sente la lie, & qui fasse dire de tout le Corps qu'il n'est composé que d'ames venales, c'est à dire que de Partisans. l'estime cette raison plus forte sans comparaison que toute autre. Toute Compagnie doit s'estudier à acquerir de l'estime, à amplifier son autorité, & à la conseruer; & il est sans doute qu'en quelque lieu que ce soit les personnes de condition sont tousiours plus respectées & qu'on les croit moins susceptibles de faire vne lascherie que d'autres. C'est pourquoy en plusieurs endroits l'on requiert la Noblesse dans un Conseiller, comme à Venise, Rhaguse, à Nuremberg, & en Pologne, depuis l'Edit de Sigismond de l'an 1550. qui portoit que nul ne pourroit estre receu Senateur à moins que son pere ne fust Noble.

Exemples. Les Romains requeroient bien en leurs Senateurs qu'ils eussent trente mil escus vaillans, pour auoir de quoy s'entretenir en un estat sortable à leur condition: mais outre cela il a esté long temps que pour estre admis en l'Ordre, il falloit auoir exercé quelque vne des hautes Magistratures: c'est pourquoy de cinq ans en cinq ans les Censeurs enregistroient au roolle du Senat tous ceux qui auoient eu des Charges publiques: Et quand Sylla le voulut réplir & en mettre au lieu de ceux qu'on auoit fait mourir, il institua vingt Questeurs, & Cesar quarante après luy, afin qu'à l'instant ils eussent entrée au Senat, & le pouuoir d'opiner. Et quoy que sous les Empereurs il y ait eu quelque relasche pour le fait des Charges, neantmoins les sages & vertueux Princes n'y ont iamais voulu admettre aucun libertin ou fils d'affranchy, qui estoient sans comparaison plus considerables que tout le tas des Partisans, par ce que hors le malheur de la guerre qui les auoit rendus eux ou leurs parens esclaves, il n'y auoit bien souuent rien à reprocher en leur vie. Et bien dauantage, Alexander Seuerus ne voulut iamais en admettre en l'Ordre

L'Ordre des Cheualiers, qui n'estoit que miroyen, parce qu'il estoit la pepiniere & le seminaire de celuy du Senat. C'est l'estime qu'on a tousiours fait de cet Ordre supreme, si bien qu'au temps mesme de la decadence finale del'Empire, l'on n'y receuoit que des personnes de qualite, connus par leur vertu & par leurs merites, suivant ce qu'en dit Theodorice & Cassiodore, *admittendos in senatum examinare cogit sollicitus honor senatus.*

De toutes ces causes en naist vne quatrieme, qui est vn monstre; sçauoir, la diuision & desvion de vostre Compagnie; monstre voirement, si nous n'aimons mieux l'appeller vne peste, qui vous infectant, porte en suite avec soy l'infection & la corruption par toute la France. Messieurs, croyez moy, vous n'avez rien à craindre des armes du dehors; & quand vos Ennemis auroient autant de Provinces pour eux qu'ils en ont contre, ils ne vouspeuent rien faire, pourueu que vous conspiriez tous à vne mesme fin, & que vous fassiez la paix, ie ne dis pas au dedans de la Ville seulement, mais dans vous mesmes. Ie ne sçauois penser à cette prodigieuse grandeur où est montée la Republique Romaine, sans entrer dans des transports d'estonnemens, & sans conceuoir comme vn prodige leur iudicieuse conduite. Car qui est ce qui l'a ainsi eleuée, ce n'a pas esté le nombre des armées qu'elle entretenoit? au commencement elle n'estoit composée que de trois mil hommes de pied & de trois cens cheuaux; & toutesfois à peine estoit-elle establie, qu'elle se suscite des guerres de gayeté de cœur. Ce n'estoit pas sur la forteresse de ses remparts qu'elle se fioit, à peine y auoit-il quelque terrasse pour renfermer enuiron mille maisons, ou plustost chaumieres qui furent premierement basties. Estoit-ce point l'intelligence qu'elle auoit avec les Villes voisines? bien loin de cela, il n'y en auoit point qui ne taschast de l'estouffer dans le berceau. Qu'estoit-ce donc? sans doute il ny a point d'autre cause humaine, que l'Vnion admirable de toutes ses parties. Il ny auoit point de Citoyen depuis le plus grand iusques au plus petit, qui ne concourust à l'augmentation de sa ville, avec autant d'ardeur que s'il eust crû pouuoir s'acquérir vn Royaume à luy tout seul. Que ne fist point le Senat apres l'adultere commis en la personne de Lucrece? Ie rapporteray volontiers en passant l'histoire de ce temps-là, qui a beaucoup de conformité avec la conioncture de vos affaires. Le Senat auoit esté maltraitté par Tarquin le Superbe, qui en auoit fait mourir les principaux, banny les autres, ou fait languir dans des prisons autant qu'il pouuoit s'imaginer y en auoir qui detestoient sa tyrannie: Le peu qui en restoit estoient si effrayez de ces cruantez mouyes, qu'ils n'osoient pas mesme lascher vne parole qui approchast de la plainte; si bien que quand Brutus s'en vint du camp de deuant Ardee à Rome,

4. Cause de
desunion.

& qu'il descouurit son dessein, à peine le peurent-ils croire, & n'osèrent se declarer iusques à ce qu'il les eust rassurez. Qui ne se fust pas douté de quelque fourbe de la part d'un homme qui estoit du sang Royal? Enfin les voilà assemblez, & dans la resolution de ne plus recevoir Tarquin, l'affaire est communiquée au peuple, tout le monde y consent. Mais comment se defendre? leur ruine estoit ce semble inévitable: le Roy estoit devant Ardée avec une puissante armée, & eux n'avoient pas un homme sur pied, ny pas une place que leur ville. Les Bourgeois ne sont pas d'ordinaire bons Soldats hors de leur foyer: n'importe, la iustice de la cause les anime, Brutus leur leue toute crainte en leur remontrant que l'armée Royale estoit fatiguée des guerres passées, que les soldats n'auroient pas d'autres sentimens que leurs Concitoyens; & que quand mesmes il y en auroit de mal affectionnez, leurs femmes, enfans, & proches parens, & tout leur bien estoient en la ville, qui seruoient d'ostages tres-assurez. Incontinent tout le monde prend les armes, le Senat donne ordre au dedans, & luy accompagné des plus courageux s'en va devant Ardée, l'armée luy tend les bras, & le Tyran est contraint de s'enfuir. Ce n'est pas le tout, le voilà aussi tost reuenu aux portes de Rome avec les forces de Porsenna, & la reduit aux abois. Qu'arrive il des prodiges sur prodiges. L'un arreste toute l'armée ennemie au bout d'un pont, pendant qu'on le rompt derriere luy, & tout chargé de coups se jette dans le Tibre, & se sauve devers les siens: un autre s'en va au camp de Porsenna & le fait trembler par sa constance: il n'y a pas iusques aux filles qui disputent avec les hommes à qui fera plus paroistre de generosité: personne ne veut escouter aucune proposition du Tyran, tout le monde luy resiste; en un mot, & luy & ceux qui l'assistent sont contrainsts de leuer le siege, voyans qu'il n'y a pas moyen de les desvuir. Vous n'estes pas, graces à Dieu, en ces extremitez-là; mais cependant appliquez cet exemple à vos affaires, & vous verrez qu'il n'y a gueres de difference, sinon qu'un grand Roy leur faisoit la guerre sous le nom & pour un Tyran, & que les Tyrans vous la font sous le nom d'un Roy enfant & innocent. Faites-vous un modele de constance & de generosité sur ces braues hommes-là, & apprenez que rien ne vous peut perdre si vous les imitez. Souvenez-vous que quelques emotions & diuisions qui soient arrivées entre le Senat & le peuple, pendant que cet excellent Ordre s'est tenu estroitement uny, rien n'a pu esbranler l'Estat Romain, non pas mesme la sedition des Gracches, mais dans la guerre civile d'entre Sylla & Marius: les Senateurs s'estans partagez, l'on vid bien tost les restes voler, & les proscriptions enregne. Cesar n'auroit iamais entrepris de porter les armes contre sa Patrie, s'il n'estoit assuré de la fidelité des Tribuns, & qu'il auoir

*il leur
de la desu-
nion.*

Intelligence avec quelques Senateurs ; & ie puis dire que iamais les Ministres n'auroient entrepris ce qu'ils ont fait sans l'intelligence qu'ils ont mesnagée avec partie de vostre Compagnie. Malheureux interets, qui portez les esprits à des aueuglemens si estranges ! tel les reclame aujourd'huy qui en portera la peine ! & Dieu qui vange les crimes tost ou tard permettra qu'eux ou leurs enfans subiron le ioug qu'ils peuuent secotier avec tant d'auantage : qu'ils prennent garde qu'il ne leur arriue le mesme qu'à ceux des Romains que ie viens de dire, qui sans gouter le fruiet qu'ils auoient esperé de leurs trahisons, furent enseuelis miserablement dans les diuisions ciuiles dont ils estoient la cause. Messieurs, ces exemples vous doiuent faire apprehender, pensez y bien, & sçachez que si iamais vous auez deu parler hautement ; c'est à present, où il y va de vostre autorité, de l'honneur de vostre Compagnie du salut de vos Freres, de la liberté de vos Concitoyens, en vn mot, du repos de toute la France. C'en est pas à present qu'ils faut s'estudier à obliger les Ministres, si vous l'auiez fait par le passé, vous en estes loüables, parce que peut-estre presentiez-vous les maux qui sont arriuez ; mais c'en est fait, le masque est leué ; & il est besoin aujourd'huy d'vne con- corde & d'vne conspiration vnanime pour le bien public, & pour la punition des melchans.

Veritablement il y a lieu de s'estonner qu'il y en ait encore entre vous qui proposent des voyes d'vne paix si des-auantageuse lors que le peuple est le plus animé. & que vous voyez que toute la Noblesse qui n'a point d'attache d'interest à la conseruation des Ministres, vous offre son courage, & que toutes les Prouinces vous tendent les mains. Pleust à Dieu que tout fust bien pacifié : tous les gens de bien ont à le souhaiter, & n'y a que les mauuais François qui demandent la continuation des desordres : mais s'il est permis d'argumenter de l'auenir par le passé ; que peut-on esperer d'vn accommodement avec ces gens-là, sinon la desolation entiere de toute la France. Vous sçauiez, Messieurs, quelles paroles on vous tint à la prise de Monsieur de Broussel : la Reyne vous remercia du bon ordre que vous auiez apporté à pacifier l'émotion des Bourgeois : Elle en fit autant à Messieurs de la Ville, & en vous rendant vos Freres, elle protesta qu'elle tenoit à faueur tous vos procedez, & que bien loin de s'en ressentir, comme le simple vulgaire s'imaginait, elle vous en auoit de tres-sensibles obligations. Qui est ce qui eust rien soupçonné de funeste en ces paroles-là, si la suite ne nous l'auoit appris : peu de temps apres l'on fait deloger le Roy de Paris d'vn grand matin, sans tambour ny trompettes. Incontinent Paris est inuesty de toutes parts de gens de guerre : neantmoins parce que les Ministres trouuerent qu'ils s'estoient mespris en leur calcul, &

*Moyens
d'accommodement in-
compatibles
avec le temps
où nous sommes.*

qu'ils n'avoient pas assez bien pris le temps d'exécuter leurs dam-
nables desseins, vous y allastes, & ils entendirent à vos remontran-
ces; & apres plusieurs allées & venues ennuyeuses aux gens de bien,
ils font enfin condescendre la Reyne à cette belle Declaration, qui
deuoit seruir de pierre fondamentale au gouuernement. Elle s'y por-
ta ce sembloit sans réserve, les Princes y signent, tout le monde
s'en resjoit: voilà le Roy de retour à Paris avec toute sa Cour, tou-
te la Ville gouste le calme apres l'orage, enfin tout est en paix. Mais
combien dure cela? autant de temps qu'il en faut pour bloquer Pa-
ris, & pour faire amasser des troupes de toutes parts, afin de faire
perir en vn moment cette puissante Ville: Pour en auoir suiet, l'on
contrenient ouuertement aux principaux poincts de la Declaration;
vous voilà aussi tost dans la desffiance, & eux font prendre au Roy
vne seconde fuite vne heure apres minuit, pour reuenir comme ils
font les armes à la main, & vous contraindre de leur porter vos
testes. Tout le monde est imbu de ce procedé, la foy publique y est
violée, les droicts diuins & humains sont renuersez; & nonobstant
cela, vous y enuoyez; la Ville y va, vous faites des remonstrances
par escrit, vous faites représenter de bouche; à tout cela la respon-
se est qu'il faut perir. Et apres cela vous tenterez encore des voyes
de douceur! Pourquoi? est-ce pour prier les Ministres de vous par-
donner? Vous deuez croire que si l'impuissance ne les en empes-
che, il n'y a point de pardon pour vous; Est-ce pour obuier au pil-
lage de la France & à sa ruine totale? Au contraire, il n'y a point de
guerre qui ne soit plus à souhaiter que la meilleure Paix avec ces
gens-là. Dieu sçait quel traitement ils luy feroient apres auoir re-
connu les bonnes inclinations qu'ont les peuples pour eux. Est-ce
pour faire voir la iustice de vostre procedé, & les mettre entie-
rement dans le tort? comme s'ils n'y estoient pas desja, & que
la France ne sceust pas de quelle façon vous vous estes com-
portez.

*Le Parle-
ment ne doit
point mettre
bas les ar-
mes.*

Mais l'on me dira, qu'il est bien raisonnable que le Par-
lement fasse le premier pas, que ce seroit reduire la Reyne à
des submissions indignes de sa qualité, que de la vouloir obli-
ger à vous offrir la Paix, & qu'il vaut mieux que vous en ayez
l'affront, que non pas elle. Je voudrois qu'il ne tint qu'à des
submissions de toute la France qui a les mesmes interets que vous,
que nous n'eussions vne veritable paix; mais comme il nous est
permis de douter de la iustice de leurs procedez, ie pretends que
vous deuez retenir vos armes, & que la Reyne doit commander
à ses Ministres de mettre bas les leur, qu'elle doit desboucher Pa-
ris & rendre la liberté du commerce, sans parler qu'elle vous liure
l'au-

Malheur de ces desordres, avant que jamais vous songiez à aucun accommodement. Cette proposition est bien hardie pour ne pas dire insolente; il est vray, eu égard à nostre esclavage passé, qui ne nous eust pas permis de parler si librement: mais graces à Dieu nous goustons au moins en ce moment la douceur des Saturnales, comme faisoient les Esclaves chez les anciens Romains, qui pouvoient ces iours-là reprocher à leurs Maistres tous leurs défauts sans crainte du supplice. Je pretends pourtant qu'il n'y a rien de plus iuste: car en quoy ne le seroit-il pas? tout le pis qu'on peut dire est que le Parlement auroit eu le dessus, qu'il auroit fallu à la Reyne ceder au temps & accorder tout, & que cette levée de boucliers que les Ministres ont fait, passe & passera pour ridicule: Et après cela quelle conclusion? le Parlement en abusera-t-il? voudra-t-il secoüer le ioug de l'obéissance? esteindra-t-il les loix pour la defense desquelles il est armé? Cela ne peut tomber sous le sens commun de ceux qui sçavent comme quoy Messieurs du Parlement ont agy depuis le mois de May dernier. S'ils eussent eu de mauvais desseins aux Barricades, il leur estoit tres-aisé de les exécuter, ils pouvoient ensevelir sous vne mesme ruine tout ce qu'ils eussent voulu, lors qu'il y auoit cent mille hommes sous les armes qui ne faisoient qu'attendre leur ordre, l'on peut dire que trois iours durant ils ont esté Maistres absolus de Paris, & qu'ils n'auoient que trop de personnes à exécuter leurs commandemens: c'estoit du temps assez pour prendre leurs auantages: mais cette Auguste Compagnie a les lys trop bien grauez en l'ame, pour en vouloir à la tige, bien loin mesme de se preualoir de tant de bonne volonté qu'on leur tesmoignoît pour se vanger de leurs ennemis, ils s'en seruent pour pacifier tout, & vsent avec tant de moderation de cette victoire qu'au moment que parut Monsieur de Broussel en la ville, ils font mettre bas les armes, & en moins d'un rien tout fut aussi calme que s'il n'y eust pas eu de broualque.

*Messieurs
du Parle-
ment ne peu-
uent abu-
ser de leurs
armes.*

La France sçait combien ils ont esté rebutez de fois à S. Germain après la premiere fuite qu'on a fait prendre au Roy; on les renuoyoit souuent sans les entendre après les auoir fait garder le muet comme on dit des six heures entieres; par fois on leur donnoit audience à vne heure de nuit; par fois on passoît le temps à des badineries, on différoît le plus souuent pour vne autre fois, enfin que ne leur a-t-on point fait? & cependant a-t-on ouy dire qu'ils ayent entretenu des intelligences secretes avec les ennemis de l'Estat, comme on leur a voulu imposer à cette derniere fuite; ils sçauoient fort bien que le suiet de la premiere, estoit pour exécuter le mesme dessein qu'ils taschent d'exécuter à present.

commençoient à faire des hostilitéz, elles approchoient de Paris de tous costés, mais parce que c'estoit en vne saison où il ne faisoit pas bon pour les Ministres, on les leurre de la Declaration derniere, l'on sçauoit à Paris leur impuissance, & estoit aisé d'aller querir le Roy à S. Germain, & le ramener, ce qui n'est pas sans exemple, & faire pis si le Parlement eust voulu. Ceux qui ont enuie de broüiller, ne perdent point des momens si pretieux, & des gens si fort esclairez n'auroient pas fait des pas de Clerc si manifestes : la Reyne croit-elle estre plus en seureté à S. Germain qu'elle n'estoit pour lors ? elle a des forces veritablement, mais elles sont dissipées & esparées en trop d'endroits, pour pouuoir empescher que cent mille hommes qui peuuent sortir de Paris, n'aillent l'inuestir : c'est ce qu'on a proposé dès le commencement & qui a aussi esté reietté, pour ne point s'opposer à la liberré & aux contentemens du Roy. L'on ne peut donc pas iusques icy se plaindre que le Parlement ait abusé insolemment de l'auantage qu'il a eu : car quoy que la Declaration derniere soit au nom du Roy, toutes fois, il n'en faut point faire la petite bouche, les Ministres ne l'ont consentie que par force, tout le monde le sçait, & leurs procedez l'ont bien fait voir depuis. L'on pouuoit dire pour lors que le Parlement auoit eu le dessus, aussi bien qu'aux Barricades, & cependant quel auantage en tire-t-il ? at-t-il voulu sapper par des voyes indirectes, l'Autorité Royale ? at-t-il remué, ou tenté autre chose que ce qui estoit contenu dans la Declaration ? n'a-t-il pas poursuiuy l'establissement de la Chambre de Iustice, pour trouuer de l'argent au Roy, à quoy les Ministres se sont tousiours opposez ? en quoy le peut-on donc accuser ; si ce n'est de trop de douceur, & d'auoir après tant de fourbes & de crimes, toleré des harpies dans le Ministère.

Je veux donc qu'on dise que la Reyne a cédé, & qu'elle y a esté contrainte, que cette leuée de boucliers à quoy l'ont engagée ses Ministres, n'a fait qu'apprester à rire, & qu'à faire voir la foiblesse de son party ; quel mal en peut-il arriuer ? elle est bien asseurée qu'on ne luy en veut non plus qu'au Roy ny à aucun de la maison Royale, & que tout ce qu'elle risque en cet accommodement, est qu'il luy faille abandonner ses Ministres, & notamment celuy qui a le plus de part en ses bonnes graces, qui est remettre le Royaume en seureté, & luy redonner le calme, & que d'ailleurs le Parlement ait contentement, tant pour luy que pour les peuples & les Princes qui le protegent. Il n'y a personne qui doute que ceux qui se sont rangez de son party, ne l'ont fait qu'en consideration du repos public & de l'aersion qu'ils ont pour le

mauvais Ministère. Le rang que les Princes vnis tiennent à la Cour ne leur permet pas de penser à vn changement d'Estat, comme ceux de saint Germain publient, ils ne peuuent pretendre au dessus de ceux qui tiennent le party des Ministres, comme aussi ils ne peuuent estre plus bas qu'au second lieu. Tellement que la Reyne peut dissiper tous les orages qui s'en y vont fondre sur elle, en donnant satisfaction au Parlement & aux Princes. Que si elle suit ses mauvais Conseillers, elle met le Royaume en vn danger évident, & l'expose en proye. Quand l'on s'embarque en de semblables affaires, l'on n'en void point les issues, il n'y a que Dieu seul a qui tous les moments sont presents qui les connoisse: tout ce que la prudence humaine nous enseigne, est de prevenir les mal-heurs tant que nous pouuons, & de ne nous pas engager en haute mer, quand nous voyons la tempeste qui s'appreste. La Reyne defunte fournit d'un puissant exemple, pour faire apprehender à la Reyne Regente, pareil traitement qu'elle a receu: certe leçon luy deuroit estre vtile, & luy apprendre, que quand le Roy fera Maieur, il peut auoir vn Ministre semblable au Cardinal de Richelieu, qui luy pourra faire souffrir les mesmes rigueurs qu'il fit souffrir à la defunte. Et si cela est, à qui aura-t-elle recours? aux Ministres d'aujourd'huy? c'est vne folie que de croire qu'ils subsistent, quand par impossible on les laisseroit en France, iusques à ce temps-là. Il n'y a point d'enfant qui ne soit bien aise de sortir de dessous la ferule de ses Maistres, & quelque traitement que fasse le Cardinal au Roy, qu'il tasche d'obseder par des charmes de libertinage & de contentement, quand il sera capable d'agir de luy mesme, ce sera le premier dont il se defera; ioint que dès à present il est tres mal en son esprit, & que bien qu'il n'y ait que de ses Emissaires auprès de luy, ils ne sçauroient empescher qu'il ne tesmoigne le mescontentement qu'il en a, & le peu de plaisir qu'il prend à entendre parler des défaites imaginaires des troupes Parisiennes, qu'on publie incessamment à ses oreilles. Ar-elle les Parlements & la Justice de son costé? elle ne le peut esperer, puis qu'elle contribue de toutes ses forces à les destruire. Sera-ce point les peuples? he-las, elle en est bien estoignée! l'affection qu'ils ont eu pour elle, quand ils l'ont veüe dans l'oppression d'un insolent Ministre, s'est changée en vne estrange auersion, ouy en auersion, ie l'ose dire, puis qu'au lieu du soulagement qu'ils esperoient d'elle, ils ne voyent que des surcharges d'oppression de sa part, & que Comi-res à leurs portes qui les traittent comme des forçats.

Le crois auoir suffisamment montré que la Reyne ne risque rien

*Le Parle-
ment ne doit
pas mettre
bas les ar-
mes.*

en faisant mettre bas les armes à ses Ministres ; voyons maintenant à quel danger s'exposeroit le Parlement , s'il faisoit comme on demande le premier pas , & s'il se soumettoit encore une fois après tant d'autres. Quelle seurété y auroit-il pour luy ? le peu de fidelité qu'on a expérimenté dans les Ministres , desja par deux fois , ne permet pas d'en tenter une troisieme ; ce ne seroit pas faire en gens prudens , que de rechercher les precipices qu'ils ont euites. Après la victoire de Scipion sur les Carthaginois , l'on proposa dans le Senat ce qu'il en falloit faire ; Cn. Cornelius Lentulus fut d'avis de les ruiner tout à fait , parce que de tous les traitez qu'on auoit fait avec eux , ils n'en auoient pas obserué vn , qu'ils ne demandoient iamais la paix , que quand ils n'en pouuoient plus , & que puis que l'on ne leur pouuoit oster la perfidie qui leur estoit naturelle , au moins leur falloit-il oster la puissance de nuire. Et quoy que cét aduis ne fust pas fuiuy pour l'heure , neantmoins l'on y fust obligé après , à cause de ce qui arriua depuis , c'est à dire à cause de la foy qu'ils violerent après tant de traitez , & qu'ils violoient sans cesse. Aussi quel traité peut on faire avec les Ministres qui font comme on tient que faisoient Alexandre sixiesme , & son neveu le Comte de Valentinois , que Machiauel met pour le Parangon des Princes : car quelque paix ou accord qu'ils fissent , il n'y auoit iamais de seurété , d'autant qu'Alexandre ne faisoit rien de ce qu'il disoit , & que le Comte ne disoit rien de ce qu'il faisoit. L'histoire marque les grands sermens qu'il fit pour assurance de la paix avec les Princes qui s'estoient liguez contre luy , lesquels après auoir attiré sous ombre de bonne foy , il fit après cruellement mourir , sur quoy Alexandre dit en riant , qu'il auoit ioué vn tour d'Espagnol. Leçon aux Princes vnis de ne se fier iamais à des infracteurs de la foy publique , imitateurs encore en ce point de Maximilian premier , qui disoit qu'il ne faisoit iamais de traité avec l'ours douzieme , que pour l'abuser & l'amuser , & pour se vanger de dix-sept iniures qu'il pretendoit auoir receues des François. Et quoy Messieurs , les Princes oferont-ils donner leur foy à des gens qui n'en ont point ; & si vous entendez à vn accord , croyez-vous qu'ils le tiennent , eux qui ont de grands interets à prendre leurs seurtez , pensez-vous qu'ils iouent à des ieux d'enfans ? & les Prouinces qui sont pour vous , que diront-elles ? & celles qui ne sont pas encore declarées , le voudront-elles faire , si elles entendent que vous traitez de paix. C'est vn artifice , ne vous y fiez pas , & tout ce que pretendent les Ministres , est de vous oster l'appuy , que vous auez & l'union qui vous rend inuincibles. Puis qu'il

n'y

n'y a donc point de foy, à quoy pensent ceux qui conciaient aux voyes de douceur & à des articles si plastez, n'en a-t-on pas fait & de bouche & par escrit? qu'a produit la soubmission du Parlement, sinon des traitemens qu'on ne receuroit pas mesme du Turc: il n'en faut pas esperer d'autres à l'aueuir, n'en doutez point.

Mais quoy, sera-t-on tousiours en guerre? & si la Reyne ne veut faire mettre bas les armes, y aura-t'il moyen de subsister? le peuple sera-t'il tousiours dans l'oppression? pourrons nous voir emporter ou rompre leurs meubles, & eux mesmes traïner comme des scelerats à la queue des cheuaux, sans en estre touchez? veritablement quant aux peuples, cela est digne de compassion, particulièrement pour le menu de Paris & des enuirs; mais quelque chose qu'il perde, il ne s'en plaint pas sur l'esperance qu'il a que vous le protegerez, comme vous auez commencé, il est tout persuadé qu'à des maux violens qu'il souffroit, il faut endurer de violens remedes: cela ne sert qu'à l'aigir tous les iours contre la milice Cardinale, qui est plus en hazard par la campagne chez les Payfans, qu'elle n'est entre les mains de nos soldats: au contraire, quand ils voyent ceux cy, tout leur est ouuert, l'on n'entend que des benedictions sortir de leur bouche, & que des prieres à Dieu que vos bons desseins réussissent. Vous deuez vous seruir de cette affection pendant qu'elle dure, & en faire vostre profit. Ils ayment mieux perdre leur bien pour la deffense de la iustice, & souffrir tout d'un temps la derniere violence des Ministres, que de languir perpetuellement sans mesmes oser se plaindre.

Mais ie dis plus, il n'est pas possible de faire paix avec le Conseil de la Reyne: premierement, parce qu'on n'en scauroit faire qui ne soit honteuse: secondement, parce qu'elle ne peut estre que trop dangereuse: & en troisieme lieu, parce qu'elle ne se peut faire du tout. Permettez moy, Messieurs, de vous faire voir ces trois raisons dont se seruit autrefois Ciceron en pareille occasion contre Marc Antoine fauteur de la tyrannie, d'où les Romains ne faisoient que sortir après la mort de Cesar. Le Senat fit force procedures contre luy, & mesme le declara Perturbateur du repos public, & ennemy de la Patrie, nonobstant quoy, il se trouua des Senateurs accommodans, qui firent plusieurs ouuvertures de paix, & Ciceron qui prenoit de loing le carnage que ce Barbare tyran auroit exercé, si les esprits de la Cour se portoient à les entendre, s'y opposa verement & en

*Preuues que
la paix ne
se doit faire*

*La 1. raison
est que ces-
te paix est*

deshonneste. remonstra les consequences par ces raisons : premièrement, il
 7. *Philipp.* fait voir que cette paix seroit honteuse, parce que les Arrests du
 n. 11. Senat deuoient estre sacrez & inuiolables, & que la legereté & l'inconstance estant blasrables en qui que ce soit, elles le sont sans doute beaucoup plus dans vn si Auguste Corps : quelle apparence y auroit-il donc, de casser les decretz qui auoient esté faits contre luy, ce qu'il estoit necessaire de faire pour en venir à vn accommodement, quelle honte ne seroit-ce point au Senat de receuoir celuy qu'il venoit de declarer ennemy du public, & dont il auoit loué & recompensé les ennemis ? Messieurs, vous auez dans toutes vos procédures fait voir clairement combien le Ministère du Cardinal Mazarin vous déplaist, & combien il est pernicious à l'Estat, vous l'auiez declaré Perturbateur du repos public, & ennemy du Roy & du Royaume, vous auez confisqué ses biens comme d'un Criminel, quelle apparence donc d'en venir à vn accommodement ? vous paroïssoit-il lors de vos procédures, Criminel & Perturbateur du repos public, & aujourd'huy innocent ? ce seroit faire tort à vos iudicieuses conduites, & n'y a point de si petit raisonnement qui ne vous condamnaist de boutade & de passion aueuglée. Si vous estes dans le sentiment que vous estiez pour lors, & s'il vous paroïst Criminel en tout temps, pouuez-vous éuiter qu'on ne vous accuse de legereté & d'inconstance, si vous entendez à vn accommodement ? De quelque costé que vous tourniez, il n'y a point de paix à faire qui ne soit honteuse à vostre Compagnie, à moins que vous ne la donniez. *Tempe est* (disoit Ciceron au Senat Romain) *summo Consilio er- bis terra, presertim in re tam perspicua consilium intelligendi de-*

*La 2. raison
 est que cer-
 te paix est
 dangereuse.*

Secondement, le mesme Orateur fait voir qu'une paix ne pouuoit estre sans danger, parce que ses parens & amis demeurans en la ville & estans extremement puissans ne manqueroient pas à prendre leur temps, & à remuer tout de nouveau quand l'on y penseroit le moins, que les gens de bien qui s'estoient declarez contre eux, se trouueroient exposez à leur rage, & qu'ainsi l'Estat ne pouuoit éuiter sa ruine. Messieurs, vous iugez bien ce qu'il y a à craindre si vous faites la paix. Il n'est pas possible de faire des traitez sans que les parties relaschent chacune de son costé, autrement si l'une retenoit tout son droit & que l'autre relaschast tout, ce seroit vn partage mal fait où tout seroit d'un costé & rien de l'autre, ce qui s'appelle donner la loy & non pas

traitter. Si donc vous en venez à vn accommodement, qui est-ce qui donnera la loy? la Reyne ne pretend pas vous la donner, à mon aduis, estant en la posture où vous estes: vous ne pouuez non plus pretendre la luy donner absolument, cela passeroit pour vne insolence qui ne seroit pas supportable dans des sujets. Il faut donc de necessité que vous relaschiez de vos droits: & que relascherez-vous? sera-ce que vous permettrez que le Cardinal demeure en France en quelqu'une de ses Abbayes: ie ne croy pas que vous en ayez la pensée, non plus que ie ne croy qu'on ait à Saint Germain la pensée de vous le demander, cela estant moralement impossible. Sera-ce à condition que le Cardinal sortira de France, qui est l'unique pierre d'achoppement? nous n'en sommes plus dans ces termes-là, les choses ont changé de face; & ceux qui le protegent & qui le suivent, ne sont pas moins criminels que luy, pour ne pas dire plus. Si vous vous contentez de bannir le Cardinal, tous ces gens-là demeureront; & si cela est, en quelle assurance serez vous, s'ils viennent à reprendre leur credit, comme il leur sera facile quand vous aurez mis les armes bas, en quel estat reduiront-ils la France? des paix de contrainte sont à des ames vangeresses, des esquillons & des flammes dans le cœur qui ne s'esteignent iamais; nous en auons veu l'experience, mais ce n'a esté que ieu au regard de ce qui se fera si vous relaschez. Comment pourront subsister les Princes, qui ont avec ardeur embrassé vostre party? seront-ils en seureté de leurs testes s'ils sont contraints d'obeir à ceux contre qui ils sont armés? seront-ils en égale puissance? cela ne se peut, deux contraires, disent les Philosophes, ne se peuuent endurer en vn mesme suiet: & en matiere de grandeur, & de grandeur ennemie, il n'y peut auoir de pareil. Quoy donc, donneront-ils la loy? il seroit necessaire pour le repos du public, mais cela ne se fera pas dans vn accommodement, & par consequent il est moralement impossible de faire de paix, sans s'exposer à vn danger tres-éuident. Mais cela est estrange, ie ne veux point de paix, qui est la chose du monde la plus souhaitable: ie responds ce que fit Ciceron, *Nec ego pacem nolo, sed pacis nomine bellum inuolutum reformido: quare si pace frui volumus, bellum gerendum est: si bellum amittimus, pace nunquam fruemur.*

De ces deux raisons l'on tire la troisieme par vne consequence necessaire, que cette paix ne se peut faire: car de quel front vous pourront regarder ces gens-là, qui se sont vantez de lauer leurs

La 3. raison
que la paix
ne se peut
faire.

mains en vostre sang ? qui ne demandoient pas moins que huit
 Conseillers & quatre Presidens à leur choix, pour les immoler
 à leur fureur comme des victimes ; & vous comment pourrez
 vous les regarder de bon œil ? serez-vous toujours dans la dé-
 fiance, ou toujours en armes, cela ne se peut faire. Et le peu-
 ple qui n'aura peut-estre pas tant de retenue que vous, pourra-
 t'il voir de ses yeux des gens qui ont exercé tous les actes d'ho-
 stilité imaginable sur tout ce qui luy appartenoit ? qui ont pu-
 blié par tout qu'ils ne metteroient jamais les armes bas qu'a-
 près auoir fait vn village de Paris, & réduit les Bourgeois à al-
 ler la corde au col demander pardon, qui en ont proposé le pillage
 à leurs soldats, au lieu de solde & d'autres recompenses, qui
 autorisent le viol, les larcins, & les sacrileges : & eux pourront-
 ils voir des Bourgeois qui leur ont fait la nique, & qui leur ont
 appris en tant de rencontres, qu'ils auoient plus de courage qu'eux
 & moins de temerité, après tant de libelles qu'ils ont fait publier,
 où ils ont descouvert leur infamie & l'énormité de leurs crimes,
 enfin après les auoir fait démentir de ce qu'ils se sont si insolem-
 ment vantez. Je ne dis rien des autres Parlemens, avec qui vous
 auez fait alliance, ie ne parle point des gens de guerre que vous
 faites venir, ny des Seigneurs que vous auez engagez en vostre
 party ; ils ne sçauroient faire de paix s'ils ne la donnent, il est im-
 portant & pour eux & pour vous qu'ils subsistent, & cela estant
 ie consens tres-librement à la paix, tout le monde aura suiet de se
 resioüir, & de benir Dieu pour le soin que vous auez eu d'vn
 pauvre estat desolé, autrement mourons plustost que de rentrer
 dans la seruitude qui ne sçauroit estre que plus rigoureuse que la
 mort. *Nomen pacis dulce est, & ipsa res salutaris ; sed inter pacem
 & seruitutem plurimum interest. Pax est tranquilla libertas ; serui-
 tus malorum omnium postremum, non modo bello sed etiam morte re-
 pellendum.*

Cic. Phil. 2.

Mais après tout, dira-t'on il faudra que le Roy soit le Maistre :
 ie l'auoue, & personne ne le luy dispute. La Reyne veut restabli-
 son autorité qu'elle pretend estre fort lezée en tous ces grabuges ;
 elle le veut rendre absolu au point qu'il estoit quand elle a pris la
 Regence : les Roys ne prennent point la loy de leurs Subiets,
 mais les Subiets de leurs Roys ; & faut tost ou tard qu'ils se ren-
 dent obeissans. Qui est-ce qui doute de cela ? mais il y a bie à distin-
 guer entre la puissance d'vn Roy maieur, & de celle de ses Ministres
 dans

dans la minorité: le Roy n'est pas à présent en estat d'agir de sa personne, il faut donc que ceux qui ont le plus d'intérêt en la conservation de son Royaume refrenent l'insolence de ces zelez Ministres qui sous ce masque de l'autorité Royale, tranchent de souverains, & ravagent le Domaine du Roy comme vne terre ennemie. Est-il possible que si le Roy auoit la connoissance des miseres de son peuple, il ne fut pas touché sensiblement? & ces harpies ne songent qu'à se repaistre du peu de sang qui leur reste.

Ces voleurs detestables, nous ont depuis trente ans voulu faire passer pour legitime vne Polytrique de Tyran, & publié par tout que le Roy a droit de vie & de mort sur ses subjets, que nos vies & nos biens sont a luy, & qu'il en peut disposer comme bon luy semble, comme en estant le Maistre Souuerain. Il est vray que les subjets sont obligez naturellement d'employer leurs vies & leurs biens pour le seruice de leur Prince: mais il ya bien de la difference entre ces deux propositions: le Prince peut prendre, & disposer de nos vies, & de nos biens à sa fantaisie, & nous deuous employer vies & biens pour le Prince; la premiere suppose vne puissance despotique & seigneuriale; & la seconde vne sujettion dans le subjet qui l'oblige à seruir son Prince aux despens de son sang, & de ses biens, quand la necessité est grande. Iamais la France n'a esté en gouuernement despotique, si ce n'est depuis 30. ans que nous auons esté soumis à la misericorde des Ministres, & exposez à leur tyrannie. Ceux qui ne philosophent que sur les choses presentes, & qui ne portent pas leur esprit à rechercher la verité, croyans que c'est assez que d'estre imbu d'un, Tout le monde le dit, s'estonneront peut-estre de cette proposition; mais qu'ils apprennent que la France est vne pure Monarchie Royale, où le Prince est obligé de se conformer aux loix de Dieu, & où son peuple obeissant aux siennes demeure dans la liberté naturelle, & dans la propriété de ses biens: au lieu que la Despotique gouuerne des subjets comme vn pere de famille ses esclauues. Tel est le gouuernement du Turc, qui pour cela s'appelle le Grand-Seigneur, qui peut sans iniustice mander à ses Bassa de luy apporter leurs testés, s'estant fait Maistre par la voye des armes, & ayant tousiours retenu le pouuoir de Conquerant, qui donne suivant le droit des Gens la puissance de traiter en Esclauues ceux qu'on subiu-
gue.

La France n'est pas vne terre de conqueste, c'est ce qu'il faut prouuer, & pour cet effet, il est besoin de prendre la chose dans sa source. Merouée, que nous pouuons appeller nostre premier

*Question si
le Roy est
Maistre de
nos vies &
de nos biens.*

Roy, plus à propos, que ny Pharamond, ny Clodion le Cheueux, qui ne regneroient iamais en nostre France, ayant amené vne armée considerable au deça du Rhin, & mesmes pris Treues, fut prié par Aëtius Gouverneur dans les Gaules pour l'Empereur, de joindre ses forces avec les siennes, & celles de Theodoric Roy des Gots, pour chasser Attila qui rauageoit la Gaule avec vne armée de plus de cinq cens mille combattans. Merouée ne demanda pas mieux, tant pour l'esperance du butin, que pour signifier son courage en quelque belle occasion; ce qu'il fit en effet dans la bataille Catalonique, où Attila fut deffait, & contraint de quitter la France. Deux choses furent fauorables à nostre Merouée; l'vne que Theodoric y fut tué, & qu'incontinent Aëtius fut aussi assassiné par le commandement de l'Empereur: les Gaulois demouroient ainsi en proye, si bien qu'iettans les yeux sur Merouée, qui auoit acquis grande reputation dans la bataille, ils le prirent pour Chef, & Paris premierement, & puis d'autres Villes luy ouurerent les portes, ayant appris avec combien de douceur il traittoit celles qui l'auoient receu: le voilà Maistre sans coup ferir, & pas vne de nos Histoires ne dit autre chose, sinon, qu'après cette bataille-là, estant alleché par la beauté & bonté du Pays, il gagna quelques Villes qui le receurent à bras ouverts apres la mort d'Aëtius. Et pour monstrier que nos Gaulois se soumirent volontairement à luy, & que iamais ils n'y furent contraints par la voye des armes, c'est qu'ils chasserent son fils Chilperic, tout Roy qu'il estoit, à cause de ses vices, & qu'ils auoient élu selon la forme ordinaire, & rappellerent vn Gillon qui estoit Romain pour se remettre sous la domination de l'Empereur: élire & destituer ne sont pas des marques d'un peuple subiugué, mais d'un peuple libre qui prend vn Chef pour estre protégé contre ses ennemis. Je passe quantité d'autres raisons que ie pourrois alleguer, mais pour faire court, ie viens à la question, & dis que les Roys de nos temps ne peuuent pretendre sur la France autre droit que celui qu'auoit Merouée, puis que iamais le gouvernement n'a manqué, & que s'il y a eu quelque changement, ce n'a esté que dans la succession de nos Princes, sans que la France ait cessé d'estre Monarchie: de sorte que l'on peut tirer cette consequence, que la France n'estant point terre de conqueste, ne peut estre traitée en esclau, estant chose inouïe, que de dire qu'un Chef à qui l'on se soumet volontairement, ait le mesme droit sur ceux qui s'assuiettissent, qu'un Maître ou Seigneur sur ses Esclaues. Aussi les bons Empereurs Romains ne vouloient pas qu'on les appellast *Domini*, c'est à dire, Seigneurs, mais bien Princes; telmoiu Suetone dans la vie d'Auguste

& Pline le ieune disoit à Traian. *Principi scdem oboiñes ne sit Domino locum.* Cette difference fut bien remarquée par les anciens Perles, qui appelloient, au rapport d'Herodote, Cyrus l'aîné Roy, Cambises Seigneur, & Darius Marchand, parce que l'un s'estoit monsté Prince doux & debonnaire; l'autre hautain & superbe; & le troisieme trop exacteur & trop auare. La definition de Roy qu'apporte Aristote au 3. de la Repub. s'accorde avec ce que nous auons auancé, où il dit, que le Roy deuient Tyran pour peu qu'il force la volonté de ses subjets; ce qu'il faut prendre, non pas au pied de la lettre, autrement il n'auroit pas le pouuoir de leur donner la loy, & les plus iustes du monde deuiendroient Tyrans; mais en sorte qu'il doit luy mesme obeir aux loix de la Nature, & gouverner ses subjets par la Iustice naturelle, qui veut qu'on rende à chacun ce qui luy appartient. Cela paroist par les marques qu'il donne de son administration, dont les principales sont de craindre Dieu sur tout, d'auoir de la compassion des affligez, d'aimer ses subjets, de se rendre ennemy des meschans; & en un mot, iuste enuers tous, n'estant pas plus dispensé de la loy de Dieu que le reste des hommes, mais au contraire, estant obligé d'y obeir, & les subiets aux siennes, l'on peut dire que cette loy de Dieu doit estre la Maistresse, & la Reine de toutes les actions de part & d'autre. Et pleust à Dieu que cela fust; nous ne verrions pas le deplorable estat où est auourd'huy la France reduite, & ne souffririons pas que des Ministres insolens nous fissent passer pour constant que les loix d'un Estat ne peuuent subsister sans quelque iniustice.

Neantmoins l'on m'obiectera qu'outre cette obeissance le subiet est obligé à quelque redevance enuers son Prince, & que iamaïs l'on n'a veu de subjets sans rendre tribut, d'où vient que quand l'on demanda à nostre Seigneur, s'il falloit rendre le tribut à Cesar, il donna ouuertement à entendre qu'ouy, en disant: Rendez à Cesar, ce qui est à Cesar. Tout cela est vray, mais il y a bien à distinguer entre le Tribut pris generalement, & la qualité du Tribut; il n'y a point de subiet qui ne doie en qualité de subiet, quelque tribut à son Prince, dès l'heure mesme qu'il s'y soumet, qui n'est autre chose, à le bien prendre qu'une subsistance qu'on luy donne pour l'entretien de sa maison, & pour les affaires qui concernent la seureté & le repos de l'Estat. Et c'est ce que nous appelons Domaine; duquel les Rois de la premiere & seconde race, & mesmes beaucoup de la troisieme se sont contentez sans rien leuer au delà sur leurs subjets, si ce n'estoit en quelque cas extraordinaire. Et est à remarquer que ce Domaine est inalienable, parce que les subjets l'ont affecté au commencement à la suân

*Quel tribus
l'on doit au
Roy.*

*Quand ie
parle des
peuples, ie
n'entends
pas les par-
ticuliers :
mais les
Estats &
les Parle-
mens qui
font pour le
peuple.*

stante des Rois ; & qu'ils se sont obligez à luy en payer exacte-
ment les reuenus de droict naturel, de sorte que quiconque ne le
fait, outre quil offense Dieu mortellement, est encore obligé à
restitution, parce qu'ils s'en sont desfaits en faueur de la subsistance
du Prince. Mais ce qui est à noter, ils ne se sont iamais deportez
de la connoissance des subsidez extraordinaires quil a fallu leuer
sur eux, & n'y a nulle prescription qui ait pû acquerir aux Rois le
droict de faire des leuées sans leur consentement, pour quelque
cause que ce soit. La raison de cecy se tire de la maxime que nous
auons posée, que le Roy n'a point de droict sur les biens des parti-
culiers, & partant il ne les peut obliger à les luy bailler sans iniu-
stice. Aussi voyons-nous que les premiers Rois qui ont commencé
à leuer sur le peuple, en ont fait vn poinct de conscience, & s'en
sont accusez deuant Dieu comme d'une chose iniuste, & qui ne
leur estoit pas deuë. Tefmoin S. Louis qui cōmanda à Philippe son
fils aîné & successeur, de remettre les Tailles qu'il auoit esté con-
traint de leuer à cause des guerres, & luy defend d'en leuer aucune
si l'vrgente necessité ne l'y oblige : ce qui fait voir que la taille n'e-
stoit pour lors qu'un subside extraordinaire, non plus que la leuée
de Louys le leune de la 20^e partie du reuenue de ses subietz pour
vne fois seulement ; telle fut encore la Maletore de Charles VI.
Et parce que les Estats voyoient que depuis S. Louys, les leuées
se faisoient comme ordinaires, il y fut arresté en présence de Phi-
lippines de Valois l'an 1333. qu'il ne s'en feroit aucune sur le peuple
sans son consentement. Les Deputez des trois Estats tenus à
Tours firent à Louys XI. par forme de don pour deux ans seule-
ment quelque somme considerable comme vn octroy qui fut es-
galé sur lesdits Estats, sans toutesfois tirer à consequence, & sans
que ledit octroy pust estre appellé Taille ou impost. Et fut remon-
stré aux Estats tenus en la mesme Ville sous Charles VIII. par Phi-
lippines de Comines, qu'il n'y auoit point de Prince qui eust pou-
voir de leuer impost sur ses subietz, ny prescrire ce droict, sinon de
leur consentement. Bon Dieu que nous sommes à present esloi-
gnez de cette condition-là ! En ces temps-là, si quelque necessité
pressante obligeoit les Rois à exiger quelque tribut tribut de leurs
subietz, c'estoit avec des protestations de le supprimer aussi tost
qu'ils en seroient deliurez ; ainsi que fit Philippines le Long, qui mit
le premier vn double sur la liure de sel ; & depuis Philippines de Va-
lois declara par lettres patentes de l'an 1328. qu'il ne vouloit, ny
n'entendoit que le droict de Gabelle, qui estoit pour lors de qua-
tre deniers pour liure, fut incorporé au Domaine. Est-ce là vne
marque d'une puissance souueraine sur nos biens ! la Monarchie
est

est la mesme qu'elle estoit; le Roy à present regnant l'a eue par succession. En ce temps-là l'on ne leuoit rien sur les subjets que par leur consentement, & aujour'd'huy on leur raut tout ce qu'ils ont en depit d'eux. Considerez cecy infames Partisans, & cessez de vous vouloir faire passer le gouuernement de France pour despotique.

Ce sont-là les leçons que la Reine deuroit faire apprendre au Roy son fils; elle deuroit luy représenter par ces exemples qu'il ne doit pas abuser de son autorité, & que les Tailles qui montent aujour'd'huy à des sommes si excessiues ne luy sont point deuës selon les loix du Royaume, & que iamais les Rois ses predecesseurs ne les ont leuées que par violence, ou par tolerance. Il est vray que c'est là vne science que nous ne scauons point aujour'd'huy, où nous sommes si accoustumez à l'esclauage que nous ne pouuons croire que nos peres ayent iamais esté libres; mais qu'elle luy apprenne s'il luy plaist que ce n'est pas le plus seur pour vn Roy que de tenir ses subjets en bride par la violence des extorsions; car en pensant leur oster les moyens de se rebeller, on ne captiue pas leurs volontez pour cela, & tost ou tard, à la moindre esperance de mieux, ils secouent volontairement le ioug, sans auoir égard, ny à serment, ny à respect. Qu'elle luy fasse voir que les inuenteurs de nouueaux impôts ont eu pour l'ordinaire des fins fort tragiques, & que les Roys n'ont pas esté exempts du bouleuersement, tant en leurs personnes qu'en leurs Estats: car sans parler des notes d'infamie, dont les peuples marquent la reputation des Princes pour tel sujet, comme firent les Romains à l'endroit de leurs Censeurs Liuius & Claudius, qu'ils nommerent les Sauniers pour tesmoigner la haine qu'ils leur portoient, qu'elle sçache qu'Acheus Roy des Lydiens, fut pendu par ses subjets, les pieds en haut & la teste en la ruiere, à cause des subides qu'il vouloit exiger. Philistus fut en partie caue de la haine que les Syracusains conceurent contre Denys le Jeune, leur Tyran, & finalement de sa perte, à cause des exactions violentes qu'il exerceoit sur eux. Au commencement de cette Monarchie vn nommé Procles, fut lapidé par les habitans de Treues, pour auoir conseillé au Roy Theodebert de charger ses subjets de nouueaux subides: le mesme mal-heur enseuelit Theodoric Roy de France, & luy fit perdre sa couronne. Il n'y a pas vn siecle que Georges Preschon fut cruellement executé à mort; & que Henry Roy de Suede, dont il estoit le Gouverneur fut chassé de son Estat pour le mesme sujet. Nos Histoires nous marquent vne infinité de pareils exemples. Du temps de Charles V. surnommé le Sage, l'on massacra deux Mareschaux de France, & peus'en fallut que le troisi-

Impôts causes de grâds troubles.

me n'eust la mesme fin; & la fureur se porta si auant que l'on esgorgea des Daciers iusques sur les Autels, comme des victimes publiques. Sous Charles VI. toute la France ne fut-elle pas sur le point de changer de Maistre, & quoy que les leuées, & contributions se fissent avec quelques formes d'Estats, & pour la necessité; neantmoins le peuple faisant tousiours instance contre Maistre Jean de Montagne, Intendant des finances, auteur de nouvelles Daces, l'on fut contraint de l'abandonner, & eut la teste tranchée aux Hales, avec vne Doloire, quoy qu'il eust fait bastir les Celestins & donné la grosse cloche de Nostre Dame. Mais à quoy bon chercher des Histoires anciennes, puis que nous voyons tous les iours par effet, la haine que les peuples portent aux Partisans, n'y ayant presque point de Prouince, ny de Ville en France, où l'on n'en ait massacré quelqu'un depuis trente ans.

Et ne sert de rien de dire que ceux qui l'ont fait en ont esté punis, & que les Villes qui ont refusé d'obeyr aux ordres des Partisans superieurs, ont esté traitées en ennemies par les gens de guerre qu'on y a enuoyez pour viure à discretion, tesmoin la Ville d'Angers l'an passé: il ne sert dis-ie rien de parler de la sorte, l'on ne peut pas vaincre les sentimens, ny les volontez; tel void vn exemple de chastiment deuant soy qui espere estre plus heureux dans le mesme crime, & le pouuoir euit. Ce sont des secrets qui semeshagent en haut, & où nous n'y voyons rien.

Je sçay bien qu'on peut encore repartir que quand les peuples se sont souleuez, l'on a sceu prendre le temps, & les chastier à propos, que les vrais Politiques dissimulent pour quelque temps, iusques à ce que cette beste indomptable, ait poussé son plus grand effort; que ce seroit ietter du feu dans l'huile, que de vouloir chastier vn peuple quand tout conspire à la reuolte, mais qu'on luy cede quelque chose en apparence, pour luy serrer apres plus fortement la bride, & luy donner de l'esperon, que les Rois ne sont iamais chiches d'accorder à leurs subjets ce qu'ils veulent en cet estat-là, parce qu'ils n'en tiennent rien s'ils ne veulent; si bien qu'apres tout les rebellions causent vne perte inéuitable à des subjets. Quand j'aduouerois tout cela, c'est presenter à des peuples animez vn mauuais miroir, que de leur faire voir qu'il n'y a iamais eu de seureté à s'accorder avec les Rois; car qui est ce qui ne void que pour euitier pareil chastiment, il n'y a rien qu'on ne fasse quand ce seroit avec la plus grande iniustice du monde, qu'on détourneroit les Rois legitimes, neantmoins cette consideration ne touche point à l'égal de la peine qu'on se represente qu'il faut souffrir; & l'on se iettera plustost entre les mains d'un Barbare, & d'un Ennemy, que de

s'accommoder avec vn Prince qui ne propose pour atticles que des rouës & des gibets ; car au moins a-t-on esperance d'un plus favorable traitement sous quelque autre que ce soit : la plus-part des reuolutions des Estats sont arriuez par là , & sans que l'apprehende d'abuser du temps , & d'estre long , i'en marquerois assez pour preuue de mon dire.

Je reuiens donc à ma proposition , & dis que la Reine deuroit faire lire , & comprendre ces Histoires-là au Roy son fils , & le nourrir dans vn amour pour ses sujets au lieu de l'animer à la vengeance contre les Parisiens & tous les autres fideles seruiteurs : Car si les peuples , comme il est infallible , ont connoissance de cette nourriture ; que dirôt-ils en eux-mêmes , s'ils ne le declarét tout haut ? que peuuent-ils attendre de meilleur que par le passé ? quoy , il y a trente ans qu'ils sont sous vne tyrannie , & ils en voyent trente autres qui viennent , ou dauantage , qu'il leur faudra estre encore pis ? à quoy se doiuent-ils resoudre ? les traits de la necessité sont cuisans , & tel se void obligé de faire ce qu'il n'auroit iamais pensé. C'est vn pernecieux conseil qu'on a donné à la Reine de luy faire risquer le tout pour le tout ; elle commence à en voir la consequence , elle a crû n'auoir que le Parlement de Paris en teste , elle luy fait la guerre , & ie ne sçay si elle n'a point affaires de luy auioird'huy pour estre maintenue , & ie ne sçay s'il en pourroit venir à bout quand il l'entreprendroit ; Elle a ietté le dé la premiere , & luy en suite , ils n'en sont plus les maistres , ny l'un , ny l'autre ; c'est à la fortune à iouer à son tour , où plustost à Dieu à faire voir vn effet de sa souveraine puissance.

*Leçon au
Roy.*

La Reine ne doute pas , si on ne la flatte , que tout le monde la condamne , & si la voix du peuple est la voix de dieu , qu'elle tire la consequence. C'est vne des grandes marques qu'il y ait d'un changement d'Estat , quand les peuples n'ont plus de respect , ny de crainte pour leurs Souuerains , & quand ils les mettent au pis faire : Denis le Tyran voulut bien changer de baterie , quand on luy rapporta que ses sujets ne se soucioient plus de ses rages , ny de ses tourmens , mais il n'en estoit plus temps ; & iugea bien qu'il estoit perdu , comme en effet , si-tost que son ennemy se fut présenté vers Syracuse , tout le monde s'y retira comme à vn azyle , & luy , fut abandonné miserablement , despoüillé de son Estat , & réduit à l'esclavage. Voilà ce qu'il faut représenter au Roy d'un costé pour luy faire apprehender de mal traiter les peuples , & de l'autre ces saintes instructions que donne l'Empereur Theodoze à son fils Honorius dans Claudian , où il apprendra en substance , que les armes ne mettent pas les Couronnes à l'abry des coups de la fortune , mais bien l'amour des sujets ; qu'un Prince ne se peut faire

aimer par force, & que le Diademe qui ne subsiste que par les piques des Gardes est bien près de sa cheute; que celui qui pense épouvanter les autres par le nombre de ses Satellites, craint plus qu'il n'est craint, & que pour estre en seureté, il vaut mieux faire le pere, & le Citoyen, que de faire voler les testes des Princes, ou des Conseillers, qui peuuent faire ombrage.

*Qui terret, plus ipse timer, Sors ista tyrannis
Conuenit, inuideant claris, fortesque trucidant.
Tu ciuem patremque geras tu Consule cunctis.
Nectibi, &c.*

O que c'est vne pernicieuse Politique, que de porter les Rois à faire tout ce qu'ils peuuent plustost que ce qu'ils doiuent, & que c'est mal connoistre les fondemens d'une Monarchie Royale, que de vouloir faire passer vne autorité sans bornes pour légitimé.

Car outre que de cette façon il n'y auroit nulle différence entre vn Roy & vn Tyran, à prendre mesme le mot en sa plus odieuse signification; il est constant à quicqu'il examinera de près, que dès lors qu'un Roy abuse du pouuoir que Dieu luy donne en cette qualité, & qu'il contreuient à son deuoir, il cesse d'estre Roy, & les subiets d'estre subjets. La raison en est euidente, mais mal-goustée par les Politiques du temps; à quoy pourtant ils n'ont point de repar-tie: la voicy, Quand les Rois viennent à la Couronne, ils iurent sur les Saintes Euangiles, qu'ils maintiendront l'Eglise de Dieu à leur pouuoir; qu'ils obserueront les loix fondamentales de l'Estat; & qu'ils protegeront leurs subjets selon Dieu & raison, ainsi que de bons Rois doiuent faire; & moyennant ce serment, les peuples sont obligez de leur obeyr cōme à des Dieux sur terre & le serment qu'ils en ont fait aux premiers Rois, dure encore à present, à cause de la succession perpetuelle qui s'entretient en la France. L'un & l'autre serment est respectif, & comme le Roy peut iustement faire punir par toutes les voyes d'une iustice rigoureuse des subjets contreuenans à la promesse qu'ils ont faite de luy obeyr, comme à leur légitime Monarque, dans tous les articles qui ne choquent point les trois fondamentaux que j'ay posé; de mesme les subiets sont-ils exempts de l'obeissance, quand les Roys violent leur serment: car s'ils renuersent les loix de l'Eglise, qui est le subiet qui leur obeira, ou qui est obligé de leur obeir: c'est la grande question meüe du temps de Henry III. à quoy il ne pût trouuer de solution qu'en se rendant Catholique. S'ils contreuiennent aux loix fondamentales de l'Estat, comme s'ils pretendent faire tomber le Royaume en quenouille, vendre & aliener leur Domaine, les subiets sont exempts de leur en redonner vn autre, & de leur obeir en l'autre point; tout cela est sans difficulté, & faut

fait conjecture qu'il en va de mesme pour la troisieme circonstance du serment, que si les Roys ne protegent leurs subiets selon le droit & la raison conformément aux loix de Dieu & aux Ordonnances des Estats que les Cours Souueraines sont obligez de faire executer, comme les ayant en depost, les subiets sont exempts de l'obeyssance; & bien dauantage, s'ils sont opprimez iniustement & avec vne violence tyrannique, qui ne peut compatir avec la Monarchie Royale où les subiets ne s'obligent aux Roys que pour en estre protegez contre ceux qui pourroient troubler leur repos; tellement que s'ils le troublent eux mesmes, ils cessent d'estre Roys & les subiets d'estre subiets. Aussi voyons-nous que quoy que les Romains n'eussent rien tant à cœur que d'estendre leur seigneurie, & de faire de nouvelles conquestes, neantmoins ils n'ont iamais autorisé les reuoltes des subiets contre leurs Princes legitimes qu'en cas d'une iniuste oppression; & est certain que les peuples ont plustost eu recours à eux, qu'eux aux peuples, pour faire chasser les Roys qui abusoient de leur autorité, tesmoin les villes de la Grece qui leur enuoyerent des Deputez pour les prier de les aller secourir contre leurs Tyrans. Il est vray qu'ils estoient bien aise de rencontrer des occasions & des pretextes si fauorables: car comme ils croyoient que c'eust esté vne iniustice que d'exciter vne reuolte & de corrompre des subiets, aussi s'imaginoient-ils qu'ils eussent commis vne lascheté trop grande s'ils les eussent laissez dans vne oppression iniuste quand ils auoient recours à eux, tant il est vray que les subiets ne sont obligez aux Roys qu'entant qu'ils sont Roys, & qu'ils n'abusent pas de leur autorité. Il n'en va pas de mesme dans la Monarchie seigneuriale, où les subiets sont bien obligez par serment au Monarque, sans que le Monarque s'oblige à rien s'il ne veut, & de quelque violence qu'il vse enuers eux, ils n'ont iamais de iustes suiets de se rebeller (ie parle icy selon le droit des gens & non pas selon les maximes du Christianisme) la raison est, parce que le Monarque ne se defait iamais de la qualité de Seigneur, & qu'un Seigneur, à prendre le mot en sa rigueur, n'a point d'autre loy que son espee, pouuant de droit quand il veut rair, & biens & vies de tous ses subiets, faire d'autres Colonies & de nouvelles peuplades, comme il le pouuoit quand il les a premierement assuietis par la voye des armes.

Il faut donc que le Prince d'une Monarchie Royale soit soumis à ses subiets, & qu'il n'ose faire ce qu'il voudroit bien, crainte de les offenser? Nullement, mais le Roy & les subiets ayans vn mesme

Objection.

*Dionien la
vie de Tra-
jan.*

Dieu pour maistre, ses loix & ses commandemens doiuent estre la regle de leurs actions. Ces grands Politiques oseront-ils dire que Traian ne se comportra pas en Empereur quand il fit Licinius Sura Prefet du Preetoire & qu'en luy donnant l'espee nuë qui estoit la marque de sa charge, il luy dit, ie te donne cette espee, Sura, dont tu me seruiras fidelement si ie te commande quelque chose selon le droit & l'equité, sinon, ie te dispense de ton obeyssance, & seray bien aise que tu t'en serues contre moy-mesme. Pensons nous qu'Alexander Seuerus eust moins de pouuoir & d'autorité que Caligula ou qu'Heliogabalus, parce qu'il n'en abusoit pas comme eux; que Tacitus fût moins Empereur que les autres par ce qu'il ne vouloit rien faire sans l'aduis & le consentement du Senat; & pour parler de nos Roys, Louys XII. qui estoit les delices du peuple & qui faisoit cōscience de leuer quelque chose sur luy crainte de le faire crier, estoit-il moins Roy & moins absolu que n'estoient ses deuanciers? Henry III. a-t'il eu moins d'autorité que Louys XIII. pour n'auoir pas fait sauter la teste à des Montmorency, à des Mairillacs, à des de Thou & à des Cinq Mars, & pour n'auoir pas fait tant emprisonner & exiler de Conseillers & de Presidens, qu'il y en a eu sous le regne precedent, & depuis la Regence? mais le malheur est qu'on ne fait iamais conceuoir aux Roys ce qu'ils doiuent, mais ce qu'ils peuvent, & combien leur autorité a d'estendue, contre la maxime & l'instruction que donnoit le Grand Theodoze à son fils:

*Claudian
au 4. Conf.
de Rom.
Le Parle-
ment cause
du mal par
sa conni-
uence.*

*Nec tibi quid liceat, sed quid fecisse decebit
Occurrat, mentemque domet respectus honesti.*

D'où viennent donc tous ces desordres? c'est de vous, Messieurs, pardonnez-moy, si ie le dis; car si vous vous opposiez verement à ces iniustes & tyranniques procedures dès leur naissance, on ne les verroit esclorre qu'à la confusion de leurs Autheurs, & à l'honneur de vostre Compagnie. N'y a-t'il pas lieu de s'estonner que vous qui estes les Depositaires de ce qu'il y a de plus sacré dans nos Loix, ayez si long-temps toleré le trafic infame du sang des subiets du Roy? i'ay cent fois ouy dire dans les Prouinces, que tout le mal ne venoit que de vous, qu'on ne demandoit pas mieux qu'à secoüer ce ioug insupportable des Ministres Partisans, pourueu que vous donnassiez le branle, puis que vostre Parlement est sans contredit, le premier mobile de la France; & ie puis adiouter avec verité que vous estes cōplées de tout le mal qui s'est fait depuis tant d'années, hormis depuis le mois de May dernier que vous

commençaſtes enfin à vous réveiller d'une malheureuſe lethargie, qui vous a ſi long-temps tenus ſans poux, & ſans mouvement.

Il me ſouvient à ce propos de certains diſcours qu'on dit, que tint le Plaiſant, autrement le Fou du Roy, ſur le ſujet des duels du grand Bouteuille, qui auoit deſia tué ſeize Gentilshommes, au combat d'homme à homme; & comme on demandoit au Roy ſa grace pour le ſeizième, & que le Roy n'en vouloit point ouyr parler, à cauſe de tant de meurtres qu'il auoit commis, ce fou luy dit, que Bouteuille n'en auoit tué qu'un, & que le Roy auoit tué les autres, parce que ſ'il l'eût puny dès le commencement, ſelon ſes Ordonnances, il n'en eût pas tué d'auantage. J'en puis dire autant de vous, Meſſieurs, & prendre la liberté d'un fou qui eſtoit ſage, en vous remonſtrant que ſi vous auiez châtié dès le commencement les brigandages du regne paſſé, nous n'en ſerions pas où nous en ſommes maintenant.

A qui penſez-vous que les peuples puiſſent adreſſer leurs plaintes, ſi ce n'eſt à vous? iront-ils au Conſeil du Roy, où l'on ne met quaſi plus que des Partifans, pour ſe plaindre des extorſions qu'ils font? c'eſt à dire, iront-ils deuant des Iuges qui ſont parties? il n'y a pas d'apparence, & le peu de Juſtice qui s'y rend, fait meſme apprehender aux plus juſtes d'en auoir des Arreſts à leur aduantage. Pourquoy verifiez vous les Edits du Roy? eſt-ce par forme ſeulement & par une vieille couſtume? ou bien ſi c'eſt parce que vous ſeruez de barriere à certe autorité Royale, & que vous auez droit d'examiner ſ'ils ſont juſtes. Vous ſçauéz mieux que moy que les peuples n'ont aucune voix deliberatiue en tout cela, ſi ce n'eſt par vous qui eſtes comme leurs Deputez; & quand j'ay dit qu'ils eſtoient par fois exemptſ de l'obeyſſance, ie n'entends pas que les particuliers ſe puiſſent arroger ce droit, autrement ils ſe feroient juſtice à eux meſmes ſelon leur caprice, ce qui ne ſe peut pas, mais bien quand ils ſont autorifez par vos Arreſts qui tiennent lieu d'Eſtats & d'Ordonnances.

Souuenez-vous donc, ſ'il vous plaïſt, que depuis que les Parlemens ſédentaires ſont inſtituez, pour rendre plus commodément la juſtice aux ſubiets du Roy, l'on n'a tenu les Eſtats que pour remedier aux deſordres qui arriuent de temps en temps en l'adminiſtration, qu'on leur en a donné les Ordonnances, comme en dépôt, pour les faire executer en leur forme & teneur, & qu'ils en ſont chargez, tant de la part du Souuerain que des ſubiets: ſi bien que l'on peut conclurre conformé-

ment à ma proposition, que toute la corruption qui arrive dans l'administration de l'Estat, ne prouient que de la lasche tolerance des Parlemens; & que les Rois, & les peuples leur peuuent demander raison d'une iustice si mal administrée.

*Response du
Parlement.*

Ie sçay bien que vous me direz que vous estes trop près du Soleil pour ne cligner pas les yeux, qu'il se trouue trop peu d'aigles parmi vous qui puissent en supporter les rayons, que la violence d'un costé, & la diuision de vostre Compagnie de l'autre, vous a forcez de faire des choses que vous sçauiez estre contre la Iustice, qu'il y a peu de Catons en ce siecle qui aillent au Palais au trauers des piques, & qui fassent trembler les armes sans armes, comme fit l'Ancien d'Ytique celles de son Colleague qui le vouloit empescher de parler pour le bien public. Voilà, ce me semble, ce que vous pouuez repliquer à ceux qui vous accusent de trop de coniuence. Mais parlons, ie vous supplie, serieusement, est-ce là faire l'office de Iuges, & de Iuges Souuerains? Si vous n'estes establis que pour faire la volonté du Roy à l'aueugle, à la bonne heure; mais en ce cas là il n'a que faire de vous, & les peuples encore moins; ce Conseil d'en haut suffit, puis qu'aussi bien l'on n'a point d'autre raison, sinon que, *sic volo sic iubeo, sit pro ratione voluntas*. Qu'est-il besoin que des peuples viennent de si loin vers vous, si vostre pouuoir ne s'estend qu'à faire iustice entre Pierre & Jacques? ils trouueront la mesme chose auprès d'eux en leurs Presidiaux & Seneschaussées; & s'il n'y auoit que cela, l'on pourroit dire qu'il n'y auroit rien de si inutile que les Cours de Parlement. Mais i ay d'autres sentimens pour vos Compagnies, & vous mesmes en deuez auoir de bien plus grands, parce que vous en connoissez mieux le merite.

*Response à la
Response.*

Tellement que si vous m'accordez que vous auez droit, comme il est vray, de vous opposer hautement à la vexation des peuples, & de casser les faux Arrests du Conseil d'en haut, quand ils choquent vostre liberté, & celle des peuples; vous m'accorderez aussi que vous estes obligez de le faire genereusement, ou qu'il faut abandonner vos Charges.

*Charges des
Conseillers.*

Ce n'est pas en l'administration de la Iustice qu'il faut chercher à plaire aux Roys, si ce n'est en la rendant bonne: ce n'est pas là où il faut pallier la verité, la Iustice est trop auguste d'elle mesme, & donne trop d'auantages à un homme de cœur pour en estre trahie, & si la flatterie est pardonnable à des Courtisaa, elle est criminelle dans des Iuges qui ne sont Iuges que pour la punir, puis qu'elle est la mere de l'iniustice. L'Eschole de la Cour est bien differente de

de celle du Parlement ; en celle-là on apprend à plaister adroitement , & à chercher de quoy plaire aux Roys , & en celle-cy toutes les pensées doiuent rendre à chastier les fourbes , & à rendre la Justice : tellement qu'estant impossible de seruir deux Maistres si differens , sans haïr l'un & aymer l'autre , l'on peut dire d'un Magistrat qui fait le Courtisan par interest ou par affection , qu'il quitte son office de Iuge pour estre fourbe , à moins qu'il n'en vse comme faisoit Callisthenes chez Alexandre. Ce grand Philosophe voyant que son Maistre se mesconnoissoit , & qu'il se portoit à des excez de violence & de bouche , mal seans à la reputation qu'il acqueroit en ses conquestes , l'aduertissoit de ses defauts avec beaucoup de liberté , ce que le Roy auoit bien peine à souffrir ; tellement qu'Aristote craignant qu'il ne luy en prist mal , luy dit vn iour , Callisthene , où il ne faut point approcher des Roys , ou il les faut vn peu flatter : au contraire, replique Callisthene , ou il n'en faut point approcher , ou il leur faut dire la verité. Je pardonnerois à des Courtisans , quand ils ne seroient pas si rigoureux , mais il n'est pas supportable de voir des Iuges s'accommoder au temps , & feindre de s'opposer à l'injustice quand ils la voyent si manifeste.

Ouy , mais le mauvais traitement qu'on fait à ceux qui ont cette fermeté que ie dis qu'il faut auoir , n'est-il pas suffisant d'estonner les mieux intentionnez ? il est vray , Messieurs , que vous pouuez dire ce que disoit autre-fois Ciceron en cas pareil , *tenebamur vndique neque quominus seruiremus , recusauimus ; sed mortem & citionem quasi maiora timebamus , qua multò fuere minora*. En effet la mort & le bannissement de vos freres estoient pour vous faire apprehender de dire vos sentimens avec liberté : mais vous auez enfin reconnu que les maux qu'ils ont soufferts , estoient bien moindres que ceux qu'on vous a fait souffrir depuis , s'il est vray qu'il n'y a point de tourment plus rigoureux à des hommes de cœur que de viure sans honneur , ou que de mourir lentement par des apprehensions continuelles. C'est vne chose faite , recueillez vos esprits maintenant , & r'animez vos courages , toute la France vous tend les bras , ne la delaissez pas ; elle fait ses efforts , & fouille le reste de ses veines pour vous assisler ; vnissez vous estroittement , car l'vniõ de vostre Compagnie est plus forte que toutes les armes que l'on vous scauroit opposer ; d'où vient que ce n'estoit pas sans raison que le Senat Romain s'assembloit le plus souuent au temple de la Concorde , & que Q. Marcius estant Censeur , fit mettre en toutes les Cours des statues de cette Deesse , avec des Autels ,

Ep. 18.
dul. 2. à
Attic.

pour monstret que le Senat ne se deuoit iamais partager en opinions.

C'est à quoy toute la France vous coniuert, & moy particulièrement, qui finis par ces paroles de Ciceron, *Magna vis, magnum momentum est unum et idem sentientis Senatus.* C'est,

MESSIEURS,

Vostre tres-humble, & tres obeyssant
seruiteur.

AV LECTEUR,

IL y a desia long temps que cette Lettre deuoit paroistre, mais quelques considerations en ont empesché. L'Autheur a mandé qu'elle seroit suivie en bref d'une autre à la Ville de Paris, où il doit monstret l'intereſt qu'elle a de se tenir vnue avec la Cour de Parlement, & quelques avis sur le fait de la Police où l'on manque: on l'attend à la premiere poste, car il est esloigné de cette Ville.

